

concussam demolitamque viderunt ii, qui intus erant: 1440
 tum vero Sforcianis per ipsas murorum ruinas in arcem
 scandentibus cessere. Lunatenses & ipsi non multo post,
 conspectis Sforciaë signis, imperium acceperunt, quam Mon-
 clarenses cum Caprianis & Volterinis studio secuti sunt.
 Admota demum ad Piscariam castra: est id oppidum (ut
 alio loco significavimus) ad Mincii caput: arx ibi nobi-
 lissima fluvio incubans, cum ponte ac turribus utramque
 ripam amplectentibus.

Hic Sforciaë castra habenti Nicolaus Æstensis ex impro-
 viso affuit. Is de pace acturus, ad eum & Maripetrum
 legatum in castra venerat; multaque de fortunæ varietate
 præfatus (cujus ajebat Venetos Sforciamque oportere esse
 memores) pacem cum Philippo suadere cœpit: ejus se
 auctorem arbitrumque futurum, si ita eis videretur, est
 pollicitus. Addidit ad hæc, quod Sforciaë cordi esse scie-
 bat, curaturum se, ut Philippus Blancam filiam, quam
 ad eam diem dare recusasset, in castra usque (si ita illi
 placitum esset) cum ornatissimo apparatu mitteret. Ad
 ea Sforcia, se quoque quietis & ocii, a quo Venetum
 sciret non omnino abhorre, auctorem dimisit, modo
 Philippus ita evenire vellet. Quod ad Blancam attineret,
 ipse cum patre & aliis amicis in medium consuleret.
 Cum his Æstensis Mediolanum recta ad Philippum abiit.
 Interim Piscaria quadriduo postquam cœpta erat oppugna-
 ri, Contareni navaliumque sociorum virtute (nam classis
 eo sub Sforciaë adventum admota erat) vi capta, hostili-
 terque direpta est. Ad turrin demolendam, quæ non
 solum arci, sed oppido quoque prominebat, bombarda
 ingens (cujus vi Marchariaë arcis mœnia non multo ante
 miræ crassitudinis disjecta fuerant) admota est. Ejus ma-
 chinæ impetus tam vehemens fuisse dicitur, ut & domus
 aliquot oppidanorum vehementi motu terræ, qui ad ejus
 ictum sequebatur, repente conciderint: & naves, quæ in
 ipso lacu ad quingentos & amplius passus procul arce in
 anchoris stabant, quotiens lapis excuteretur, fluctuanti-
 bus aquis, inter se colliderentur. Turris igitur ea vi con-
 cussa,

*Piscaria a
 Venetis vi
 capitur.*